

'N PUNTU R'APPUOIU

A tia, sulì,
ca appena ti susì ,
lestu ntall'arcu t'apprichi rô cielu
e 'n juornu sanu
nô gghiru
cull'uoccu r'oru tuorni e arrituorni,
iu
'i luntanu ti viru
ccà ssutta superbu a taliari,
e a tia, faru ardenti,
'a matina 'u 'llustru addummannu
e 'u caluri
ca l'arduri nô cori mi pasci
e nâ menti ,
e tu
l'ùm'ra ammeccì mi cianti,
ca 'i pieri m'amprugghia
comu 'na catina
e ancora 'a pena m'allonca
ccà, 'a mia, r'aspittari.

Ma ssa bardanza
ora, mû rici a tia cchi ti vali
se 'na nuvola basta ca l'uoccu t'annorba
e râ negghia
'n sciusciu ci vo' ca ti 'ntuppa ?
Cchi ti vali se 'a sira
'a luna ti spogghia e ti curca ?
E ppi mia cchi vali
se â notti arrestunu 'i stiddi 'a bballari
'nca se 'i cuntù su' tanti
ma friddi
e truoppu ristanti ?
E iu
se ô scuru mi pierdu
e 'u jèlu mi cogghi,
cchi fazzu ?
M'addumu 'a cannula
e 'na cutra mi 'ntuppu ?
e mi cianciu, ccà, sulu, sta sorti ,
'ncuzzatu?

Ma tu scinni,
sulì,
tu cancia 'u caminu,
cciù bbàsciu
e ô cantu mi stai
e ti sientu vicinu,
cciù umanu.
Ma tu rici : “ 'N sia mai !”
E allura ?
Ah putissi.....
Iu.....truvàri putissi 'n appuaju
sicuru nâ 'n çiancu
unni ciantarici 'i pieri
e cchê manu spìnciri 'u munnu
jàutu !
e siennu ca è tunnu
cu forza agghirallu
nô viersu ri tia,
sulì,
e cuannu vicinu ti sugnu
l'ùm'ra ca 'n juornu mi rasti
tâ tuornu
e cchê capiddi nô pugnu
ti ciantu
fermu
nâ 'm puntu
e 'u 'llustru pritiennu m'â ddàri
e 'u caluri
ppi chiddu ca vali
ri juornu
e ri notti macari
e nô tronu , ora , 'a catina
finarmenti tu pruovi
e 'a pena
r'aspittari.